

哉。此源之最宜清者。也不清其源。而塞其流。況積習深痼之官兵。又不足言剿者乎。故平亂之道。莫先於清場。以爲解散。莫急於清鄉。絕其根踞。然後改用新軍。去其依附。區區太湖。周遭不過數百里。港瀆雖多。亦有止境。精兵利器。悉於形勢。何難聚而殲焉。猶或不忍。則待其窮蹙。予以自新。禁錮於工場。爲軍隊所部勒。强悍可化。誰非良民。毋徒一撫示仁。重貽後患也。若官吏將卒。虛與周旋。列陣而戲。如捉迷藏。則夫梟匪之勢力。恐非江浙所能限矣。

閱操大臣

鐵

會奏陸軍會操情形摺

竊臣等接准練兵處咨稱。擬於本午^巳秋間。調集陸軍各鎮分編爲南北兩軍。南軍以第四全鎮合之。第二鎮內暫編爲第四混成協。及新成山東一鎮內暫編爲第九混成協者。爲一軍。派統制王英楷暫充總統官。北軍以第三全鎮合之。京旗陸軍內暫編爲第一混成協。南苑一鎮內暫編爲第十一混成協者。爲一軍。派統制段祺瑞暫充總統官。預定行軍日期。在河間府一帶會集。操演業於光緒三十一年八月十九日奏請。簡派大員前往校閱。欽奉硃批。著派袁世凱、鐵良認真校閱。欽此。咨行前來。臣鐵良遵於九月十六日由京馳抵天津。會同臣世凱於二十日由津起程。馳赴河間。現已校閱竣事。謹將兩軍會操始末情形。縷晰陳之。伏查此次會操。非第以齊步伐。演技擊肄。威容壯觀。瞻而已。蓋欲以飭戎備。嫻戰術。

增長將士之識力發揚軍人之精神熟悉於進退攻守之方神明於操縱變化之用在上試出其韜畧以爲指揮在下服從其命令以勤職務而因以考軍隊程度之高下驗平日教育之得失其自編制調發行軍屯聚作戰應敵以逮地勢之區畫陣局之展布糧仗之儲峙士馬之補充水陸運輸之通滯工程防禦之完缺與諜探報告之是否適機療傷救敗之是否得力地方民情之是否融洽軍紀法律之是否嚴肅皆須精研切究至纖至悉論其序列則有前鋒隊有主力隊有旁護後護備分等隊又有假設之旁枝後備隊來源歸宿無弗貫也論其附屬則有工程隊有輜重隊有接濟衛生軍樂等隊又有軍用之鐵道電信隊備物利用無弗周也蓋自兵學日精戰理日邃有一不備不可以軍要一言以蔽之日期於實習戰事而已顧茲事體宏大端緒糾紛必資羣策羣力以觀成決非一手一足所能任臣等通籌全局會操者兩鎮四協綜計人數四萬數千人非勸擇數百里寬闊地段不足以資展布因預於河間建設閱兵處以爲挈領提綱之所置總參議一員派軍學司正使馮國璋充之佐臣等以發號施令運籌決策其下分設七處經理庶務曰評判處調查軍情論斷戰況凡各屬之評判員均隸焉曰綜理處會計度支籌備供給凡餽牽館舍車馬糧秣賓宴樂隊地方征發之事均隸焉曰遞運處載運人員輸送物品凡鐵路河道船隻車輛之事均隸焉曰傳

宣處刊布訓詞校訂文報凡電信電話報館等事均隸焉曰執法處頒示科條維持風紀凡稽查護衛憲兵巡警等事均隸焉曰接待處照料賓客安慎交際凡款勞通譯導遊陪觀等事均隸焉曰信號處發遞號音聯絡聲息凡各屬之信號隊均隸焉此其辦事之大綱既已分途而並舉庶幾規制粗備條貫靡遺至於糧餉器械尤命脈之所關實先務之爲急於是擇河問府之臧家橋沙河橋適中地方暫設軍糧分所就近饋軍米糧之外量給餅乾柴草麩料兼儲並蓄服裝則先期添製餉項則照章加給無箭子彈每礮八十出每槍五十出零件皮件隨帶備用馬匹除原有之礮馬戰馬外飭由淮練各軍酌量協撥車輛就各營輜重隊額定之數加倍備置編爲小接濟隊大接濟隊不足則雇民車此外如橋梁雷電之屬傷兜醫藥之類並一切附屬之器具材料無不廣爲措辦此籌備軍需之大概情形也南軍第四混成協先期自遷安開拔經開平附火車抵軍糧城下車度海河歷小站至馬廠與第四鎮會合同由馬廠小站分報前進循青縣滄州南皮而達東光其第九混成協則先期由山東濟南開拔經平原禹城德州而至東光合軍沿途各分隊操演均於九月二十三日齊集交河一帶北軍則第十一混成協先期自南苑開拔經涿州定興安肅而抵保定與第三鎮及第一混成協會合該鎮協先在中途逐日操演至是合軍進發分起開至納賢村板橋楊

家莊等處亦均於九月二十三日齊集高陽一帶此調拔營隊大概之情形也用兵之道奇正間出虛實相生南軍作爲江北爲後路越徐淮踰濟東迤邐而入直隸此爲假設之軍所以蓄遠勢而閎計畫其主力則萃集交河及該縣屬之富莊驛其前鋒馬隊則進抵獻縣北軍以駐紮直隸北邊及山西之後備隊爲其後路並派守德州之枝隊均係假設之軍其主力則萃集高陽其前鋒馬隊則進至該縣所屬之邊渡口南攻北禦同以河間爲兩軍會戰之區此預劃戰線之大概情形也伊古以來兵凶戰危近自火器精利槍礮猛烈尤須知己知彼慎備用防未可冒進盲攻致蹈不測是以各國用兵往往先派偵騎進而嘗敵而後大軍繼之中權後勁井然不紊此次兩軍會戰亦先令馬隊互相衝突並以偵察敵狀其主力軍則各按指定地段逐漸逼近更迭相持迨至愈逼愈緊幾於短兵相接力角肉薄之際然後發令停止攻擊此預定戰計之大概情形也先是九月二十一日作爲南軍業將德州所駐之北軍小枝隊擊破悉師北進北軍亦聞警南下抵禦二十四日南軍前鋒馬隊既達獻縣北騎亦達邊渡口均有小枝步隊隨行陣線相接各有摩厲以須之勢二十五日兩軍馬隊齊向河間進發南軍迭發探騎往來梭織北探亦不時間出旋見北軍馬隊馳至在河間府屬之太平莊以北擇地屯紮展開陣勢步隊遙掩護之南軍馬隊先已至太平莊附近既

探知敵軍所在遂趨隊馳進爭摩敵壘北軍亦盤旋而出與之抵抗彼此衝鋒交綏而止是爲接仗之始二十六日兩軍大隊相遇於河間城西南十餘里南軍步隊先據八里鋪一帶長堤順其蜿蜒之勢分隊扼守以礮隊掩護左側頗占勝勢北軍步隊分布田家莊大曲地各村內礮隊居右始而兩軍發礮遙擊繼而南軍反守爲攻以重兵包抄北軍左翼北軍瞭見南軍兵力甚厚來勢甚猛遂變攻爲守竭力抵禦幾被圍困因亦注重右側而預分大枝隊伍側擊而進向南軍左翼抄襲此避亢搗虛勢同席捲南軍礮隊亦幾失戰鬪之力兩軍勝負相當交持不下於是北軍作爲接到探報知前駐德州枝隊退至饒陽再受敵擊接應隊中道梗阻慮主隊爲其牽動乃暫約師兩退遂各罷兵是夜北軍旣向北退十數里作爲接到援師大至之耗部署各隊嚴壁以待念七日北軍佔據高壘城竇莊小白洋楊村一帶布定守局藉林木隄堰以爲障蔽並施防禦工程南軍自其對面蔡家樓趙關莊沈莊等處分道往攻因北軍阻隘負固幾不得前遂遣大隊趨其右翼且伏且進節節抄擊北軍亦悉銳撲壓南軍之右彼此均甚得手迨鏖鬪愈酣各用全力相搏槍礮互答隆隆不絕戰況最爲激烈而兩軍主力已漸接近幾於兵刃相交不留餘地始下令停息前此戰局爲之一束此實行演戰之大概情形也以上隊伍陣式或分或合倏聚倏散忽前忽卻錯綜變化異態

殊形臣等馳驅戰地隨處蒞觀詳查兩軍部署之方攻守之術要其大致互有短長此爲平時操演槍礮但憑虛施放劍戟非交手擊刺未嘗實分勝負然取其有合戰理者作爲得勢有犯兵忌者作爲失利亦足判其高下卽如二十五日南軍偵騎四出消息靈通然陣勢未能布開又距敵稍遠遽行衝突未免失之過早其與步隊亦懸隔太甚均屬險著北軍布陣對敵頗優於南軍但遣探較少進隊微緩是其小疵二十六日南軍旣據形便之地調度復能敏捷北軍工於變計乘虛襲擊均足以擅勝場但兩軍皆左翼受敵不無遺憾二十七日北軍地勢較優工作均合法度南軍化整爲散步步爲營尤深得攻堅之妙訣兩主力軍爭衡對抗可謂旗鼓相當惟兩軍右路皆稍嫌放鬆於布置尙未十分完密而北軍全部發現稍早亦未能恰合機勢總之軍旅之學至精至深窮年尙恐莫殫一蹴詎臻盡善但今觀連日操演將領皆知謀定後戰士卒咸能說以忘勞於實事之練習精神之振作確已均有進步中外觀者俱甚稱讚臣等於操畢時聚各官長據實評斷獎其已至勉其未足並惕以時艱曉以大義俾各激發忠愛爲 國干城隨卽宣述 皇仁頒賞犒師莫不鼓舞歡欣以退此評判戰狀之大概情形也復於二十八日大集兩軍整齊行列舉行閱兵典禮以肅軍容而嚴部勒臣率諸將弁均衣軍禮服至閱兵場洋員隨觀者亦各服其國禮服容與其間各

隊伍均按區定方位依次排立步隊首列工程隊次之礮馬等隊又次之器械精利士馬起
雄臣等巡閱既周爰萃集中外隨觀人員暨本軍將佐會宴於河間府學宮到者計千餘人
舉杯相贈用志不忘踰躑濟濟賓僚歡欣此觀操既畢接續閱兵之大概情形也綜計此次
南北兩軍戰兵三萬三千二百餘名備補兵二千三百餘名官佐二千七百餘員工匠夫役
七千七百餘名戰馬五千四百餘匹協濟馬四百匹運車一千二百餘輛雇用車三百餘輛
而閱兵處暨統兵各官取用尙不在內陣局之遠約三百餘里戰線之長約二十餘里而假
作勢之軍尙不在內各國來觀操者計共三十三人各省各處來觀操者計共二百數十人
均隨臣等出入河間周歷備覽此一役也仿列邦之成規創中國所未有雖未極燦然大備
之隆軌要使在伍之將士人人知擔負責任平日所授之書一一實見諸施行作戰之計畫
種種胥求其賅備而師行所過秋毫無擾風聲所播暴戢良安亦足以化閭閻之猜忌導國
民以尙武且各該鎮協成軍之先後不齊訓練之久暫亦異一旦調集合演已駸駸乎有整
齊畫一之觀將來推之各省行之通國但使教育普及又何難萬衆一致積健爲雄以饜
皇威而張國力臣等業飭各鎮協分投回防暫充總統以下各員均復舊差仍當督飭將佐
認真教練精益求精總期故步勿封日新月盛庶於 聖朝經武詰戎實事求是之至意或

有當於萬一謹繕具閱兵處人員銜名職守暨辦事章程清單各一件南北軍編制清單一件各項條規清單一件方略命令報告清單一件戰判訓詞清單一件閱兵儀式清單一件中外觀操人員清單一件並繪圖六幅祇呈 御覽謹 奏

練兵處兵部奏續擬陸軍人員任職等級及補官體制摘要章程摺

竊臣等前擬定新軍官制一摺於光緒三十年十一月十四日具奏奉 旨依議欽此欽遵在案伏思此次更定官制其宗旨要有二端一以矯人情積輕之習使文武漸定同科一以挽營員越次之風使名實不甚相遠故職秩視前較異而限制亦視前較嚴古人設官分職本屬相聯各國軍隊章程官與職亦分爲二大率以實授之官任相當之職中國自軍興以來保舉冗濫或以記名提鎮降充末弁或以候補千把驟膺統將官職既太懸殊名器不無淆雜今方整飭營伍宜以官配職俾無參差明定等級以舉其綱簡訂章程以張其目庶寓鼓舞變通之意於整齊畫一之中計軍官自正都統以下九級各任其職以類相從非由陸軍學成及曾帶新軍資及三年通曉兵事者不得與於斯選除授補署各有限制既不令以闕冗充數亦不使以猥濫見輕至軍官之外經理餉械醫務法律等員是曰軍佐所司事務重要且繁必各有專門之學始能勝任與軍官事同一體其品秩官階亦應相似惟於官名